



REPUBLIKA E KOSOVËS / REPUBLIKA KOSOVA

GJYKATA THEMELORE GJAKOVË

Numri i lëndës: 2021:074080
Datë: 30.08.2022
Numri i dokumentit: 03373813

C.nr.498/21

GJYKATA THEMELORE NE GJAKOVË - Departamenti i Përgjithshëm, Gjyqtari Durim BALAJ, në çështjen e paditësve A. R., F. M., F. Z. Z., T. G. dhe L. LL., që të gjithë nga Gjakova, të cilat sipas autorizimit përfaqësohen nga zyra e avokatisë Arben Biblekaj dhe Fitim Gashi, me seli në Prishtinë, rruga “Fehmi Agani”, hyrja 25/4, kundër të paditurës Komuna e Gjakovës – Drejtoria Komunale e Arsimit, me seli në Gjakovë, lidhur me çështjen juridike kompensimin e shpenzimeve të ushqimit në punë, jashtë seancës, me 30 gusht 2022, mori këtë:

A K T G J Y K I M

I. APROVOHET në tërësi e bazuar kërkesëpadia e paditësve A. R., F. M., F. Z. Z., T. G. dhe L. LL., që të gjithë nga Gjakova.

II. DETYROHET e paditura Komuna e Gjakovës – Drejtoria Komunale e Arsimit me seli në Gjakovë, që në emër të kompensimit të shpenzimeve për ushqim (shujta ditore) për periudhën nga data 01.09.2020 e deri me 31.03.2021, paditësit A.R., për 82 ditë të prezencës në punë, t’ia paguajë shumën prej 164,00 euro, ndërsa paditësve F. M., F. Z. Z., T. G. dhe L. LL., për nga 147 ditë të prezencës në punë, t’ua kompensoj secilit veç e veç shumën prej nga 294,00 euro, e në shumë të përgjithshme 1.340,00 euro, më kamatë ligjore prej 8%, e cila do të llogaritet nga data 15.04.2021 (data e paraqitjes së padisë), e deri në ditën e pagesës definitive, si dhe shpenzimet procedurale në shumë prej 332,00 euro, krejt këto në afat prej 7 ditësh, nga dita e marrjes së këtij aktgjykimi nën kërcënimin e përmbarimit me detyrim.

A r s y e t i m

Paditëset në këtë gjykatë përmes të te autorizuarve të tyre kanë ushtruar padi me datë 15.04.2021, kundër të paditurës Komuna e Gjakovës – Drejtoria Komunale e Arsimit me seli në Gjakovë, më të cilën ka kërkuar që të obligohet e paditura, që t’iu kompensojë shumat dhe atë: paditësit A.R. shumën prej 164,00 euro, ndërsa paditësve F. M., F. Z. Z., T. G. dhe L. LL., shumën prej nga 294,00 euro, dhe atë në emër të ushqimit në punë për periudhën nga data 01.09.2020 e deri me 31.03.2021, për secilën ditë prezentë në punë nga 2 (dy) euro, me kamatë

prej 8 % nga dita e paraqitjes së padisë. Në padi kanë parashtruar se sipas kontratës kolektive të arsimit në Kosovë, konkretisht në nenin 35 paragrafi 7 të saj, është paraparë se “*Të u sigurohet kompensim për ushqim gjatë punës, për ditët e pranisë në punë. Vlera e kompensimit të shpenzimit të ushqimit në punë, për një ditë punë është 2 (dy) euro për të punësuarit që kanë marrëdhënien e punës primare në institucionet arsimore*”. Kanë parashtruar se nga koha e hyrjes në fuqi e kontratës kolektive të arsimit e deri me tani, kjo kontratë nuk është ekzekutuar në tërësi, e për këtë kanë propozuar që kërkesëpadia e paditësve të aprovohet në tërësi. Shpenzimet e procedurës i kanë kërkuar.

Gjykata pas shqyrtimit paraprak, ka proceduar tek e paditura aktvendimin C.nr.498/21 të datës 09.08.2021, për dhënien e përgjigjes në padi, të cilin e paditura e ka pranuar me datë 08.09.2021, me çka konstatohet nga fletë kthesa e dorëzuar me anë të shërbimit postar të gjykatës, ndërkaq përgjigje në padi ka parashtruar me datë 31.05.2022, pra pas kalimit të afatit ligjor për paraqitjen e të njëjtës, përkundër paralajmërimit të pasojave ligjore për mos paraqitjen e saj.

Në përgjigje në padi, e paditura nder të tjera ka parashtruar se e kundërshtojnë në tërësi kërkesëpadinë e paditësve, me arsyetimin se me dispozitat kalimtare të nenit 45 të Kontratës Kolektive të Arsimit në Kosovë, është paraparë që MASH, SBASHK dhe Ministria e Financave, angazhohen bashkërisht për ti informuar dhe ndihmuar komunat, këshillat drejtuese të universiteteve dhe drejtoritë e shtëpive të studenteve që të bëjnë planifikimin me kohë të buxhetit dhe kostos financiare për zbatimin e dispozitës së nenit 35, paragrafët 5, 7 dhe 11, kur të krijohen mundësitë financiare në buxhetin e Republikës së Kosovës, por jo me vonë se viti 2023. Me propozim për gjykatën që kërkesëpadia e paditësve të refuzohet në tërësi e pabazuar.

Nga parashtrimet e palëve ndërgjyqësore të paraqitura me padi dhe përgjigje në padi, gjykata ka gjetur se nuk është kontestues se paditëset janë të punësuar tek e paditura, e po ashtu nuk ishte kontestuese se pagimi i shpenzimeve të ushqimit për periudhën e kërkuar nuk iu është ekzekutuar.

Kontestuese mbetet pamundësia financiare për pagimin e këtyre kompensimeve nga ana e të paditurës në drejtim të tani paditësve, e që në këtë rast gjykata u lëshua vetëm në vërtetimin e faktit kontestues në këtë procedurë.

Gjykata, pas pranimit të përgjigjes në padi, i ka vlerësuar kushtet ligjore nga neni 398 i Ligjit për Procedurën Kontestimore (LPK), me të cilin përcaktohet se “*Kur gjykata, pasi t’i arrijë përgjigja në padi, konstaton se ndërmjet palëve nuk është kontestuese gjendja faktike dhe se nuk ekzistojnë pengesa të tjera për dhënien e vendimit meritator, atëherë ajo, pa caktuar fare seancë gjyqësore, mund ta japë aktgjykimin me të cilin e pranon si të themeltë kërkesëpadinë*”, andaj, duke iu referuar dispozitave të Ligjit për Marrëdhëniet e Detyrimeve (LMD), përkatësisht nenit 245, paragrafit 1, me të cilin përcaktohet se “*Kreditori në marrëdhënien e detyrimit ka të drejtë që prej debitorit ta kërkojë përmbushjen e detyrimit, ndërsa debitori ka për detyrë ta përmbushë atë me ndërgjegje dhe në tërësi, në përputhje me përmbajtjen e tij*”, e lidhur me 35 paragrafi 7, të Kontratës Kolektive të Arsimit në Kosovës të datës 18.04.2017, si dhe të datës 22.01.2021, në të cilat në mënyrë të njëjtë është paraparë se: “*Të punësuarve, u sigurohet kompensim për ushqim gjatë punës, për ditët e pranisë në punë. Vlera e kompensimit të shpenzimit të ushqimit në punë, për një ditë punë është 2 (dy) euro për të punësuarit që kanë*

marrëdhënien e punës primare në institucionet arsimore”, erdhi në përfundim se paditësve iu takojnë shumat si në dispozitiv të këtij aktgjykimi dhe atë duke bërë përlllogaritjen e secilës ditë të prezencës në punë, me shumën që ju takon sipas dispozitës së lartcekur, në shumë prej 2,00 për një ditë pune.

Kundërshtimin e të paditurës lidhur me mungesën e mjeteve buxhetore, gjykata e vlerësoj të pambështetje, pasi që zbatueshmëria e kontratave kolektive të arsimit në Kosovë, ajo e datës 18.04.2017, si dhe e datës 22.01.2021, është paraparë saktësisht në nenin 2 të tyre, andaj për gjykatën ky pretendim ishte jo relevant për vendosje ndryshe.

Gjykata lidhur me kamatën ka vendosur duke u bazuar në nenin 382 të Ligjit mbi Marrëdhëniet e Detyrimeve.

Vendimin që pala e paditur ti bartë shpenzimet e procedurës, gjykata e ka mbështetur në dispozitat e nenit 449 dhe 452 të Ligjit të Procedurës Kontestimore, ku lartësia e shpenzimeve iu referohen shumave si për përpilimin e padisë shumën prej 312,00 euro si dhe taksa për padi shumën prej 20,00 euro, e gjithsejtë shumën prej 332,00 euro.

Nga sa u tha më lartë u vendos si në dispozitiv të këtij Aktgjykimi

GJYKATA THEMELORE GJAKOVË
Departamenti i Përgjithshëm
C.nr.498/21, me 30 gusht 2022

GJYQTARI
Durim BALAJ

KËSHILLË JURIDIKE:

Kundër këtij aktgjykimi mund të ushtrohet ankesë në afat prej 7 ditësh, nga dita e marrjes së aktgjykimit, Gjykatës së Apelit në Prishtinë e nëpërmes kësaj Gjykate. Ankesa duhet të paraqitet në kopje të mjaftueshme për palët dhe gjykatën.